

**Qanoq iliornikkut kommuunit akornanni aningaasaqarnikkut innuttaasullu katitagaanerisigut naligiinnerulernissaq anguniarneqassanersoq pillugu apeqqutegaat aallaavigalugu oqallinnissamik siunnersuut.**

(Inatsisartunut ilaasortaq Erik Jensen, Siumut)

**Akissuteqaat**

(Aningaasaqarnermut Naalakkersuisoq)

Qanoq ililluta kommunit akornanni aningaasaqarnikkut innuttaasullu katitagaanerisigut naligiinnerulernissamik sulissuteqarsinnaanerput pillugu oqallinneq Naalakkersuisut qutsatigaat. Nunarput tamakkerlugu ineriartorneq inuusuttunut pitsaasunik periarfissiillunilu, utoqqartatsinnut sinaakkutit toqqissisimanartunik qulakkeerinninnissaa, Naalakkersuisut pingaartippaat. Naalakkersuisooqatigiinnermut isumaqatigiissut naapertorlugu Naalakkersuisut pisortat ingerlatsiviannik ataatsimoortumik pisariinnerusumik sulissuteqarput, tassanilu pisortat ingerlatsiviata suliassanik isumaginninnera ataatsimut nalilerneqassaaq. Ataatsimut isigalugu allaffissornerup annikinnerunissaa pisortallu ataatsimoorullugu nukittunerusumik sulianik aaqqiissuteqartarnissaat, Naalakkersuisut kissaatigaat.

Kommunit akornanni aningaasaqarnikkut oqimaaqatigiinnerup pisariinnerpaamik allanngortinnissaa, namminersorlutik oqartussat kommunit akornanni ataatsimoortumik tapiissutit aaqqinnerisigut pisinnaavoq. Taamattaarlu kommunit akornanni aningaasaqarnikkut nalimmassaanermik aaqqissuussinerup piusoq naammaginartuunersoq politikikkut oqallisigineqarsinnaavoq.

Naalakkersuisut kommunit suleqatigalugit aaqqissuussaannermi ataatsimiititaliamik pilersitsipput. Ataatsimiititaliap suliassanik agguataarinninnerup siunissami qanoq pitsaanagerusumik aaqqissuunneqarsinnaanera isumaliutissiissummi suliaraa. Sulineq tamanna siunissami illoqarfinni ataasiakkaani pisortat suliffeqarfiinik inissiinnermut aamma sunniteqassaaq. Tamannalu aamma nunarput tamakkerlugu innuttaasunut utoqqarnut toqqissisimanerput sinaakkutinullu pitsaasunut qulakkeerinninnissamat tunngatillugu pingaaruteqarpoq. Isumaliutissiissut naammassippat Naalakkersuinikkut Ataqtigiissaarisooqatigiit kaammattuutit isummerfigissavaat.

Isummat tunngavilersuutillu ullumikkut maani saqqummiunneqartut aamma ataatsimiititaliap siunissami suleriarnernat attuumassuteqassapput.

Pisortat suliffeqarfiinik inissiinnermik siunnersuutip ukkatarinera, Naalakkersuisut maluginiarpaat. Pisortat suliffeqarfiinik inissiineq kommunit ataasiakkaat aningaasaqarnerannut sunniteqarnera, Naalakkersuisut miserratinginngilaat. Tamanna Inatsisartut pisortat suliffeqarfiinik pilersitsinissamik aalajangeranni, isumaliutigineqartussat arlaqartut ilaaginnarpaat. Tassunga atatillugu innuttaasut katitagaanerisa assigiinngissutaat aamma kommunit aningaasaqarnikkut atugaanni pingaarutilimmik inissisimanerat, Naalakkersuisut ilanngullugu maluginiarpaat. Kommunit ilaanni utoqqaat allanit amerlanerujussuusarput, tamannalu aningaasartuutit annertussusiannut ineriartornissamullu

periarfissanut sunniuteqartarpoq. Pissutsillu taamaattut inunnut ingerlatseqatigiiffinnullu akileraarutinut nalimmassaanermik aaqqissuussinermi maanna atuuttumi eqqumaffiginiarneqarput.

Pisortat suiffeqarfiinit Nuummit avataanut nuussinissaq arlaleriarluni oqaluuserineqartarpoq. Nussuinerit taamaattut akisuujussapput, nussuinerinullu atatillugu sulisunik piginnaasanillu tigumminniinnarsinnaaneq ajornakusoortupilussuussaaq. Pisortat suliffeqarfiinik inissiinernut atatillugu tunngaviunerusumik ajornartorsiummut isummernissaq isumaliutigineqartariaqartoq, Naalackersuisut isumaqarput. Norgimi naalagaaffiup suliffeqarfii nutaat aalaavittut illoqarfiit pingaarnersaanut inissinneqarneq ajorput, taamaaliornermi piffinnut allanut inissinneranni misinnartumik ajoquteqartoqarnissaa siumoortumik ilimanarsisinneqarsinnaappat. Periuseq tamanna iluaqutaasumik isumassarsiffigisinnaavarput.

Naggasiullugu Naalackersuisut sineriatsinni ineriartornermik malinnaaninnerat erseqqissarneqassaaq. Assersuutigalugu Saviminilerinermik Ilinniarfiup nutaap Sisimiuni pilersinneqarnissaa Naalackersuisut sulissutigaaq. Aningaasanut inatsimmik isumaqatigiissutini kingullerni aamma sineriammi illoqarfinni arlalinni inuusuttunut inissianik sanaartorneq ukkatarineqartarpoq. Taamaalilluni ingammik inuusuttut Nuummiinnaanngitsoq, nunatsinnili piffinni allani suli aallartisarsinnaanerannik qulakkeerinnittunik suliniuteqartoqarpoq. Inissiat aamma utoqqarnut inissiatut atorineqarsinnaasutut sanaartorneqarput.

Taama oqaaseqarlunga Inatsisartut oqallilluarnissaannik kissaappakka.

**Teknikimut tunngasunik ilanngussaq**

(Atuagassaangitsoq)

Piffissami 2020-2024 kommunit qaffasinnerpaamik appasinnerpaamillu isertitaqartut akornanni assigiinngissutsip, 781 mio. kr.-nik siunnersuuteqartup inerniliinera eqqortoorpianginnera maluginiarneqassaaq. Oqaasertaliineq eqqornerusoq tassaavoq aningaasat 781 mio. kr.-t kommunit marluk piffissami 2020-2023 ingerlatseqatigiiffinnut akileraarummit isertitaasa kiisalu piffissami 2020-2024 iluanaarutisianit akileraarutinit isertitaasa assigiinngissutaat.

Tamatuma saniatigut Kommuneqarfik Sermersuumi Kommune Kujallermut sanilliullugu innuttaasut tamarmiusut akornanni ikinnernik utoqqarnik innuttaqarnera eqqortuuvoq. Kommune Kujalliulli Kommuneqarfik Sermersuumit 76 procentinik amerlanerusunik utoqqartaqarnera oqaatigissallugu eqqortuunngilaq. Akerlianik Kommune Kujallermi inuit 65-it sinnerlugit ukiullit Kommuneqarfik Sermersuumit 76 procentinik amerlanerunerat eqqortuuvoq.

Kommuneqarfik Sermersuumi inuit 65-it sinnerlugit ukiullit innuttaasut tamarmiusut 7,5 procenteraat, akerlianillu Kommune Kujallermi 13,2 procentiullutik. Taamaalilluni assigiinngissut 5,7 procentiuvoq, tamannalu assigiinngissuseq sanillersuussinermi 76 procentiulluni.